



ҚАЗАҚСТАН ҰЛТТЫҚ БАНКІ

АҚПАРАТТЫҚ ХАБАРЛАР

2016 жылғы 25 қазан

Жыл басынан бері инфляция 5,6% деңгейінде қалыптасты – Д. Ақышев

Қазақстан Ұлттық Банкінің Төрағасы бүгін ҚР Үкіметінің отырысында баяндама жасады. Ол Ұлттық Банк жүргізіп отырған ақша-кредит саясатының нәтижелері және Қазақстан Республикасының қаржы нарығындағы 2016 жылғы қаңтар – қыркүйек аралығындағы ахуал туралы айтып берді.

Д. Ақышев хабарлағандай, 2016 жылғы қыркүйектің қорытындысы бойынша инфляция 0,2%-дық деңгейде, ал жыл басынан 5,6%-дық деңгейде қалыптасты, бұл дағдарысқа дейінгі кезеңнің көп жылдық мәндеріне сәйкес келеді. «Ұлттық Банк алдағы 3-4 айда жылдық инфляция бойынша нысаналы бағдарға қол жеткізуді мүмкін деп санайды», – деп мәлімдеді Д. Ақышев.

Оның айтуынша, жылдық инфляцияның 8% деңгейге дейін төмендеуі ішкі бағалардың айырбастау бағамының жаңа өлшемдеріне бейімделу процесінің аяқталуын білдіреді. «Сондықтан Ұлттық Банктің негізгі басымдығы жылдық инфляцияны белгіленген дәлізде 8% шегінде жылдам тұрақтандыру болып табылады. Онсыз инвестициялық белсенділікті қалпына келтіру және ұлттық валютадағы ресурстар бойынша мөлшерлемелерді төмендету мүмкін емес», – деп атап өтті Д. Ақышев.

Д.Ақышев: «ҚР Ұлттық Банкінің жұмысы негізінен нарықтық пайыздық мөлшерлемелерді қалыптастыруға бағытталған»

Қазақстан Ұлттық Банкінің Төрағасы Д. Ақышев бүгін ҚР Үкіметінің отырысында сөз сөйлеген кезде атап өткендей, ҚРҰБ жұмысы негізінен ақша нарығындағы нарықтық пайыздық мөлшерлемелерді қалыптастыруға бағытталған, бұл экономикадағы ақшаның объективтік бағасын айқындауға мүмкіндік береді. «Онсыз банктердің нақты секторды нарықтық жағдайларда кредиттеуі мүмкін емес. 2016 жылғы 3 қазанда Ұлттық Банктің базалық мөлшерлемені 12,5% мөлшерінде белгілегенін атап өткен жөн» – деді Д. Ақышев.

Оның айтуынша, ақша нарығында теңгелік өтімділіктің құрылымдық профициті сақталып отыр. Осыған байланысты Ұлттық Банктің артық өтімділікті алу бойынша операцияларының көлемі өсуде.

«Ақша нарығындағы мөлшерлемелер базалық мөлшерлеменің пайыздық дәлізі шегінде қалыптасуда. Пайыздық мөлшерлемелердің нарықтық құрылымы өтеуге дейінгі мерзімдер бойынша күтулерге барабар қалыптасып отыр. Алғаш рет ұзақ уақыт ішінде бейрезиденттер тарапынан ноттарға деген сұраныс туындады, бұл ұлттық валюта бағамын тұрақтандыруға қатысты сенімділікті және пайыздық мөлшерлемелердің барабарлығын

куәландырады», – деп атап өтті Д. Ақышев.

2016 жылғы қыркүйектен бастап Ұлттық Банк валюта нарығында өктемдік жүргізбейді – Д. Ақышев

Ішкі валюта нарығындағы ахуал тұрақты күйде. Қыркүйектің соңында теңгенің биржалық бағамы жылдың басынан бері 1,3%-ға нығая отырып, бір АҚШ доллары үшін 335,46 теңгені құрады. Бұл жөнінде Қазақстан Ұлттық Банкінің Төрағасы Данияр Ақышев ҚР Үкіметінің «Қазақстан Республикасының 2016 жылғы 9 айдағы әлеуметтік-экономикалық дамуы туралы» отырысында сөз сөйлеген кезде мәлімдеді.

«Қазіргі уақытта нарықта теңге бағамының күнделікті аздап ауытқуы байқалады. Бұл ретте Ұлттық Банк сыртқы және ішкі факторлардың ықпалымен қалыптасатын іргелі үрдіске кедергі келтірмейді, – деді Д. Ақышев. – Ұлттық Банк 2016 жылғы қыркүйектен бастап валюта нарығында өктемдік жүргізбейді, тиісінше біздің қатысу үлесіміз 0% болады. Теңгенің бағамы қазіргі кезде оң серпіні бар іргелі факторлардың ықпал етуімен ғана қалыптасады».

Сонымен қатар Д. Ақышев теңгенің еркін өзгермелі бағамы саясаты резервтерді біртіндеп қалпына келтіру процесін бастауға мүмкіндік бергенін хабарлады. Мәселен, реттеушінің деректері бойынша, Ұлттық Банктің алтын-валюта резервтері қыркүйектің соңында 31,4 млрд. долларды құраған. Жылдың басынан бастап 3,5 млрд. долларға өскен. Алтын-валюта резервтері көлемінің ұлғаюы негізінен алтын құнының өсуімен (9 айда 25%-ға), ішкі нарықта шетел валютасын сатып алумен қамтамасыз етілді, деп түсіндірді Д. Ақышев.

Оның айтуынша, Ұлттық қордың валюталық активтері 64,4 млрд. долларды құрайды. Ел резервтерінің жалпы сомасы 95,8 млрд. долларға немесе ІЖӨ-нің 67%-на жетті.

ҚР Ұлттық Банкі теңгедегі активтерге деген сенімнің қайта қалпына келуінің жағымды үрдістерін байқауда

Бүгін ҚР Үкіметінің отырысында сөйлеген сөзінде Қазақстан Ұлттық Банкінің Төрағасы Д. Ақышев хабарлағандай, қазіргі кезде теңгедегі активтерге деген сенімді қалпына келтірудің және депозиттерді долларландыруды төмендетудің оң үрдістері байқалады. «Халықтың және кәсіпорындардың валюталық басымдықтары өзгеріп, теңгедегі салымдардың үдемелі өсуі байқалады. Қыркүйектің қорытындысы бойынша шетел валютасындағы депозиттер үлесі 2016 жылғы қаңтардан бастап 70%-дан 58,3%-ға дейін, оның ішінде халықтың депозиттері 80%-дан 66,6%-ға дейін, заңды тұлғалардың депозиттері 62%-дан 52,5%-ға дейін төмендеді. Көбінесе бұған Ұлттық Банктің теңгедегі құралдардың тартымдылығын арттыру шаралары ықпал етті (жеке тұлғалардың ұлттық валютадағы депозиттері бойынша ең жоғарғы мөлшерлемелер 2016 жылғы ақпанда 10%-дан 14%-ға дейін артты және шетел валютасындағы депозиттер бойынша 3%-дан 2%-ға дейін төмендеді)», – деді Д. Ақышев

Ол банктердің экономикаға кредиттерінің қалдығы ағымдағы жылы өзгерген жоқ – 12,7 трлн. теңге болғанын атап өтті. Алайда, 2016 жылғы 9 айда берілген кредиттердің көлемі 525 млрд. теңгеге ұлғайып, 7,2 трлн. теңге болды. Бұл ретте, ҚР Ұлттық Банкінің деректері бойынша, берілген кредиттер бойынша сыйақы мөлшерлемелерінің қаңтардағы 23,7%-дан қыркүйекте 16,3%-ға дейін төмендеуі байқалып отыр.

«Тұтастай алғанда, қаржы нарығындағы ахуал тұрақты болып қалуда. Жұмыс істемейтін қарыздардың үлесі 2016 жылғы 1 қыркүйектегі жағдай бойынша банктердің жиынтық несие портфелінің 8,4%-ын (2016 жылғы 1 қаңтарда – 8,0%) құрады. Ұлттық Банк қаржылық тұрақтылықты қамтамасыз ету бойынша жұмысты жалғастыратын болады. Ел экономикасындағы дағдарысты құбылыстардың сақталуы жағдайында Ұлттық Банк қаржы

нарығын реттеудің контрциклдық сипатын ұстанады, банк секторының жағымсыз оқиғаларға орнықтылығын тұрақты бағалауды жүргізеді», – деп қорытындылады Д. Ақышев.

Толығырақ ақпаратты мына телефондар бойынша алуға болады:

+7 (727) 2704 585

e-mail: press@nationalbank.kz

www.nationalbank.kz